

編輯室報告

劉承賢

國立臺灣師範大學臺灣語文學系副教授

《台灣學誌》kah 是國立臺灣師範大學臺灣語文學系出版 ê 學術年刊，出版 ê 論文合該 tiòh 包括台灣研究 ê 逐款領域，總--是 tsing-kah-tann 語言學相關 ê 研究佔 khah 少數，m-tsiah 阮真歡喜 tī 第 5 期「戰後在台灣的語言接觸與語言變化」、第 8 期「台語研究」kah 第 17 期 ê 「解嚴三十年後的台灣本土語言」專題了後，tī 本期（第 23 期）會當 koh 有語言學 ê 專題出刊。

Tsit 擺 ê 專題 hām 頭前講--著 ê hit 兩擺 iū-koh 無仝，阮取「跨語言視角下本土語言的同與異」做題頭，目標有三項：第一，希望本土語言 ê 研究角度 thang 植闊，眼光 mài 勾 tī 臺灣，嘛 mài 干焦限定 tī 所謂 ê 「漢語」，tī 比較 ê 時 koh-kah mài 獨獨取臺灣 / 中國做範圍；第二，除了咱臺灣 ê 自然共通語台語，向望做族群語言 ê 客語 kah 逐款原住民語 ê 研究成果 mā 會用得愈來愈濟；第三，拈起社會語言學，希望對本土語言 ê 研究 mā 有真濟語音、音韻、句法、詞彙 tsham 語意 ê 探討，hōo 本土語言 ê 研究 uì 無仝方面連結現代語言學 ê 發展，對通世界語言學 ê 現象 kah 理論做出貢獻。

總--是咱知影國內 ê 語言學研究猶原是研究華語 khah 大面，世界上 uì 臺灣出身 ê 學者 hām 對臺灣 ê 語言有興趣 ê 外國學者，大部份 mā 是注神 tī 華語，就是因為本土語言 ê 研究產出相對 tik khah 少，tsit 擺阮學誌 beh kā 相關 ê 論文扶倚--來有影有 khah oh。

專題徵稿 ê 公告發佈了後，除了接受自由投稿，執行編輯長長短短 kā 數十位學者邀稿，tī 截止進前邀稿 ê 對象賜稿無 kah 十篇，koh 想袂到台語 ê 研究 suah 是少數。經過初審 kah 外審，有一寡稿件無行到出尾，執行編輯對 tsit 寡經過邀稿來投稿 ê 先進感覺不止仔歹勢，希望 in ê 研究成果經過修改，未來會當順序發表出版。

因為頂面 ê 過程，咱 tsit 期 ê 專題論文 suah 無 kah 一篇是專門研究台語--ê，雖然按呢，阮真歡喜看著 koh-kah 罕受著研究者注意 ê 語言成做 tsit 期 ê 主角。

咱 tsit 期 ê 頭一篇論文是林鴻瑞 ê 〈台灣南島語言時間詞之跨語言比較初探〉，tsit

篇論文無像一般 ê 做法——獨獨取一个語言 tsiah 兼做比較，鴻瑞希望一睏頭就對臺灣南島語 tī 「昨昏」、「明仔載」、「昨--日」 kah 「後--日」 ê 構詞 hām 詞意提供全面 tik ê 類型描述，甚至 mā tsham 別國 ê 南島語 kah 原始南島語做初步 ê 探討，是足有開創性 ê 一篇論文。

李淑芬、潘俞翔 ê 〈西拉雅語人物相關詞彙之構詞策略〉 ê 目標語言是 Siraya 語，因為 tsit 个語言 tī 復振過程中猶未有自做幼囡仔就講 tsit 个語言大漢 ê 母語者，兩位作者透過歷史文本斟酌歸納、整理，提出 Siraya 語「人物詞」構詞 ê 逐款方式，tse m-nā 對語言復振 ê 新詞創詞有真懸 ê 參考價值，mā 提供疊跂石，hōo 未來 beh 研究南島語「人物詞」 ê 人有一个基準點。

邱湘雲 ê 〈台灣華語、閩南語及客語人體四字格框架語塊研究〉針對人體詞 ê 四音節熟語，用三个大語言 ê 現象互相比較，走揣其中 ê 規律 kah 語意 ê 特點，論文內底 ê 發現，對教學設計 kah 教材研發來講，攏是真好 ê 參考。

曾秀萍 ê 〈女同志情慾與香港寓言：《蝴蝶》電影中的女同志主體與家國想像〉針對麥婉欣導演 ê 女同志電影《蝴蝶》做詳細 ê 討論 kah 分析。秀萍除了比較陳雪 ê 原著小說 hām 電影 ê 內容，mā kā 導演 ê 五款手路分拆--出-來，koh 指出電影按怎 kā 小說 ê 故事轉化做香港殖民地 ê 背景，hōo 性別、情慾 kah 地緣政治 tsham 國族認同產生連結，是一篇蓋有深度 ê 分析。

王婉育 ê 〈台灣營養午餐之起源與形成過程之分析（1951-1972）〉關心--ê 是臺灣學校 ê 營養午餐早期發展 ê 歷史，雖然毋是 tsit 个主題 ê 第一篇論文，毋過婉育 kā 探討 ê 時間集中 tī 五空 kah 六空年代，tsiū-án-ne 做 koh-khah 深入 ê 掰會，提供 hiàng 時詳細 ê 國際背景，mā 點出 tsit 个發展對台灣人啣食習慣 ê 影響。

蔡安理 ê 〈天文學名詞的台語新詞創制原則〉會使講是安理過去幾若冬學術專業結合教學 kah 社會實踐 ê 成果，tsit 篇文章 mā 在水是 tsit 个議題 ê 開山著作。Tsit 篇研究紀要 m-nā 有實務 ê 價值 niā-niā，未來討論台語新詞 ê 人，不管是天文學 iah 是別个領域，定著攏愛參考 tsit 篇文章 ê 原則 kah 建議，並且進行回應。

《台灣學誌》第 23 期 ê 話頭踏 kah tsia，beh 順繼恭喜本刊 tann 已經列做台灣人文 kah 社會科學期刊評比第三級 ê 期刊，tī tsia beh kā 協助學誌行政、編輯 ê 資深行政秘書謝孟珈講一聲「láo-lát」，mā 感謝投稿者、審稿人 kah 讀者 ê 付出 kah 支持，拜託逐家繼續相侷，期待逐期攏有進步 ê 《台灣學誌》！